

# 戴恭人七旬开一寿序

## 恭介

浩封恭人姻伯母楚母戴太恭人七旬开一寿序宏惟我国家设科文武并重文以制艺武以弓马所以宾进天下之才能贤德萃于朝廷以藩卫社稷而祇事宗庙祖宗立制规模宏远矣湘阴楚氏自明初迁湖南至今数百年以弓马成进士者楚镇南也湘阴左氏自南宋嘉定后由湘北湘东迁湘南至今亦数百年以制艺成进士者左钦敏也镇南与钦敏初相友善申以婚姻钦敏当登其先入之堂拜其兄崧涛拜其弟倬南以进拜其母戴太恭人谦让数四终不可得见也居其家无日月内外整肃嘻嘻嗃嗃之声不闻寻常与崧涛兄弟遊朝夕款语道述先德忠厚积累无少浮华而母太恭人淳淳于乃先君勤俭温恭恪遵祭祀务本重德蘋藻忠信宜乎神明肃而福寿长也维今之吉母太恭人七十寿辰宗族乡党欢欣詠歌音律谐和咸善为颂于是崧涛兄弟以序文为属钦敏不得辞焉乃盥手再拜而献其端曰夫人子之荣其亲也富与贵其一事矣易大傳曰崇高莫大乎富贵岂不以此然弓马制艺沦落至今日盖元人以哂谢枋得所谓一钱不值者也朝廷废之君父弃之臣子安得以为荣钦敏又当闻诸先民凡为人子者三赐不及车马不敢比踰于父也镇南与钦敏之先人稼穡诗书浮云世外所望于孙子者不在此此又乌足以为荣镇南王父北友公严君胜会公高洁勤劳神思渊深气度夷旷倘徉神鼎密岩山水之胜与农圃

野老相往还从来未闻轻履城市是盖恭逢我国家列祖列宗深仁厚泽生成教养之隆保合太和群黎沐浴以有此高人逸士非惟家庭之庆实惟我国家无疆之休欽敏先王父竹齋提督遭际圣朝中兴自军中假归闭门奉亲凡日用饮食纤细躬亲并便液秽器晨昏澣濯亦不假手仆隶者凡二十余载我严君夙夜忧勤不敢或违色笑欽敏年甫十二岁即取周子程子遗书朱子古文授之曰不如此不可以为人也以故欽敏恭逢皇太后万寿恩科侥幸举进士自甲午至今凡十三年伏处田间虽京国师友乡里父老敦劝服官不敢出也镇南以甲午正科举人乙未正科进士至今凡十二年伏处田间未尝有纤毫仕进之意介其怀来兄弟雍雍淡泊明志崧涛年逾四十恂恂礼让怀孺子敬慕之诚倬南勤苦群经英傑不羈耕牧于华容公安不蹈狂行異途以图进取是楚氏祖先治谋垂训之豫孝悌忠信涵濡淪浹而母太恭人安于寒素不以富贵科达勲庸显赫望其子有以全其志节而纯其仁孝非一朝一夕之储也吾闻之在昔王孙贾有母事齐王忠不辱其母古今称之刘歆有父刘歆事贼莽又不忠大辱其父古今醜之欧阳文忠公修贬官夷陵母太夫人甘之修以此不失令名于天下朱文公熹有父韦齋貽其子以执友李愿中之贤继往圣开来学盖天下变乱邪说流行惟时时埋以父母为心或免于戾也凡百君子介寿称觥其所以自存立者豈可不思也且自上世以来我中国疆域僅数千里地耳孟子谓舜为东夷文为西夷得志行乎中国三才服从古中国未尝以夷狄外之也尧舜禹冀方是者邦畿之外东西南朔相距五千里而冀

州广大舜又分为幽并两州盖今之沙漠古之中国也我朝开创遼阳实为唐虞旧土而今之中国吴楚秦蜀大率古夷狄也况湖南僻陋南服唐虞三代之世弃在要荒之外蛮荆极边以视湖北江苏尤为荒远周秦之際屈子南竄首以君臣纲纪发为骚经楚辞先谕我人至今二千余年仁人孝子忠臣义士萃出一隅常为天下最说者以为屈子倡之也钦敏竊妄谓不尽然夫舜以天下之尊而娥媿女英以天子之女为天子之妻以不告而娶故不得立为正妃重父母也爰暨周家内治之懿女德之備冠绝前古而风化所及莫先于南方诸侯之国汝汉之间而周南汝坟之诗妇人勉其君子不闻迯父母而卑王室文王之盛德所以为至也舜妃庙近在湘山洞庭之南苍梧之野谁非南方诸侯之国舜文德教先于屈子者千数百年而湘山汨罗今考其地皆在湘阴数十里而近是宜有仁人孝子忠臣义士聪聽祖先父母彝训躬行礼义不苟利禄者以扶持天地之颠危而非崧涛兄弟与钦敏辈所克当也若乃则古昔称先王申孝悌以敬梓桑正顺逆以尊君国凡有血气者谁不有责焉老亲在堂高年令德明发不昧怀抱优虞貽令名貽羞辱虽毫发必谨也虽斯须必谨也是则钦敏惓惓切偲之义也夫是为序

清光绪三十二年丙午孟冬月

甲午科贡士姻愚姪左钦敏顿首拜撰

## 果哉老人七十寿诗

海公世丈少壮负奇伟有古烈士风会因世变抗节山林与左  
师门水先生为莫逆交其抑郁壮怀虽暮年犹未已也 公庆七十时  
锐 客长沙未及展贺节序如流忽焉数载每询杖履精神矍铄如昔  
因补长歌恭颂难老回忆髫年随侍 左师饮 世丈家之日如在目  
前也

洞庭以南有老人家住白水之江滨铜筋铁骨心不改碧眼紫髯  
殊绝伦少年壮气冠九州一箭双雕谁与俦射策殿陛动天子傲岸塵  
世轻王侯大儒门水谈绝学时流谢尽卧山壑独与老人相往来堆髻  
盤云隻卓犖竭来契濶感萍踪苍翠怅望 神鼎松时事变幻不可度  
刹那万里来悲风我滞湘浦空踟蹰有酒不乐将何如曾当随上华封  
祝欢然一醉梦唐虞君不见秦氏纪避世吾家有绮里又不见洛水翁  
当时年少惟温公人生百年似反掌奚用矻谈窮通万古英雄一盞中

世愚晚炯臣吴英锐撰祝

## 其二

### 恭介

海涛先生七十大庆爰缀俚词敬颂 福景

大隐龙潜日将军射虎年晚来尊节概壮岁若神仙事业剑三尺  
功名月一船聲华金殿贵弧矢玉堂贤乞诏归乡里驚时变海田屠龙  
胸骹麟盤马意腾騫不觉鬚眉老犹如松柏坚天生薑桂性人仰寿星  
躔孟碗齐眉好菜衣舞綵鲜一门矜鼎 五福羨因缘咫尺瞻芝宇雄  
才老大肩怡然 曲醉倒画堂前

峻石刘祖翰拜祝撰

果哉老人既陈宜人寿联

清贡士 左钦敏撰赠

同是先朝得罪人拮据艰难念皇覽惜灵均空赋离骚今古欢

规往地天长忍问曩年怀旧辈凋零枯落寻仙源敞神界欣闻

其二

清邑庠生 何远犹祝撰

松柏茂华林逸品雙清任教大地迟春日

山河犹故国隐居偕老赢得长沙作寿星